

INUIT ATAQATIGIIT

INATSISARTUNI



UPA 2014-70
20.05.2014
Sara Olsvig

Pisortat ikiorsiissutaat pillugit Inatsisartut peqqussutaata allanngortinnissaa pillugu Naalackersuisut peqquneqarnissaannik Inatsisartut aalajangiiffigisassaatut siunnersuut, anguniarlugu sapaatip akunnerini sisamani mattussisoqartalernissaa, qinnuteqartoq imaluunniit pisortat ikiorsiissutaannik aningaasartuutitut aalajangersimasunut kiisalu aningaasartuutitut ataasiartakkanut pisartagalik pisimappat tunngavissaqanngitsumik soorlu

- **Suliffissarsissussinerup itigartinneqarnera kingorna**
- **Suliffissarsissunneqarnerup kingorna suliaartunngitsoortoqarsimappat imaluunniit**
- **Suliffissarsissunneqartoq nammineq soraarsimappat imaluunniit suliffik tunniunneqartoq qimaannarneqarsimappat imaluunniit nammineq pisuussutiminik pisartagalik soraarsitaasimappat.**

(Inatsisartunut ilaasortaq Andreas Uldum, Demokraatit)

Andreas Réne Uldum taamatut siunnersuuteqarneranut qutsavigeqqaarumavarput. Inuit Ataqatigiinni isumaqarpugut Nunatsinni suliffissaaleqineq suliffissaaleqinerullu akiorneqarnissaa ataavartumik oqalligissallugu pingaaruteqartuusoq. Tassami suliffissaaleqineq maannakkutut annertusiartuinnartoq ataatsimut iliuuseqarnitsigut illuanut saattissinnaangikkutsigu tamatta tamatuminnga kalluarneqartussaavugut. Kalluarneqaratarsinnaasummi aamma tassaapput maannamut suliffeqareersut. Erseqissartariaqarpoq suliffissaaleqinerup akiorniarneqarnissaa tassaangimmat partiit akunnerminni anneruniuffissaat – Inatsisartut tamarmiulluta tamatuma akiorniarnissaa ataatsimooruttussaavarpud.

Siunnersuulli saqqummiunneqartoq tapersorsinnaanngilarput isumaqaratta taama iliornikkut suliffissaaleqisut inuttut ajornartorsiuteqareersut sulilersinniarnissaat kukkunerussasoq. Piumaffiginninnerinnaq aqutissatuaanngilaq. Matumanimi suliffissaarusimasup qanittumik pimoorussamillu suleqatigisariaqarnera aamma eqqarsaatigisassarivarput. Ilanngullugu isiginiagassanut ilaavortaaq siunnersuuteqartup anguniagaa inatsimmi maannamut atuuttumi iliuuserineqarsinnaasuni aamma ilaatinneqareerana.

Inatsisartut upernaq manna katersuunneranni partiit tamarmiulluta suliffissaaleqinerup akiorniarneqarnissaa pingaartissimaqaarput. Tamannali nuannaarutigaluarlugu uggornartuuvoq suliffissaaleqinerup akiorniarneqarnissaanut qanorpiq aningaasalersuinissarput annertuumik aamma isumaqatigiinngissutigigatsigu. Aningaasat agguataarniarneqarnerat equngallunilu immikkoortitsinermik kommunit akornanniinnaanngitsoq, aammali suliffissaarusimasut assigiinngisitaartut akornanni immikkoortitsinermik pilersitsisussaapput, tamannalu uggornarpoq. Iliuuseqarniaraanni suliffissaarusimasut tamarmik immikkoortitsinertaqanngitsumik isiginiarneqartussaagaluarput aammalu aningaasat Nunatsinni atorfissaqartitsisunut assigiimmik agguataarneqartariaqaraluarlutik.

Taamatullu oqaaseqarluta Naalackersuisut akissuteqaataat taperserparput Demokraatillu siunnersuutaat ilalersornatigu.